

四庫全書

史部

欽定四庫全書

欽定大清會典則例卷一百四十五

都察院

一憲綱天聰十年

諭凡有政事背謬及貝勒大臣有驕肆慢上貪酷不法
無禮妄行者許都察院直言無隱即所奏涉虛亦不
坐罪倘知情蒙蔽以誤國論如盡心職業秉公矢行
三年考滿定加升賞欽此○崇德元年

諭都察院各官皆朝廷諫諍之臣朕躬如有不親政務忠良失職姦邪得位有罪者錄用有功者降謫等事爾等有所見聞即行規諫至於諸王貝勒大臣有曠廢職掌耽酒色好逸樂取民財物婦女或朝會輕慢冠服不具及以不適已意託病偷安不朝參入署者禮部稽察若禮部徇情容隱爾等察奏或六部斷事偏謬及事未審結誑奏已結者爾等亦稽察奏聞凡人在部控告未經審結又赴告於爾衙門者爾等公

議應奏者奏不應奏者逐之至爾衙門有受賄之弊
須互相防檢若以私讐誣劾定加爾等之罪其餘所
奏是者即為允從非者亦不加罪並不令爾等與被
劾之人質對欽此○順治九年

諭都察院為朝廷耳目之官上至諸王下至諸臣孰為
忠勤與否及內外官員之勤惰政事之修廢皆令盡
言如滿漢各官有賢有否督撫按各官有廉有貪鎮
守駐防各官有捍禦勤慎者有擾害地方者皆令分

別察奏其推舉銓用與黜革降罰及內外各衙門條
陳章奏有從公起見者有專恣徇私者皆令明白糾
駁欽此○十年

諭朝廷設立言官原為繩愆糾謬事關朕躬尚許直言
無隱况諸司過失理當糾舉其言果當宜虛心靜聽
即言有未當正宜分晰事理聽候朕裁不許私嗔報
復至言官論事亦須明白確指不得摭拾風影挾私
妄訐欽此○十一年

諭凡言官務在知無不言言無不實庶使僉壬屏跡中外肅清若緘默苟容顛倒黑白徇私報怨明知姦惡庇護黨類不肯糾參而誣陷良善驅除異己溷淆國是者定行重懲欽此○又

諭凡事關政治得失民生休戚大利大害應興應革切實可行者言官宜悉心條奏直言無隱如果能抒誠有裨政事朕自不靳懋賞欽此○十二年

諭凡事關朕躬何令不信何政有差諸王貝勒在事諸

臣曠職之愆叢弊之處及內外各司何害未除何利未興言官各據見聞極言無隱一切啓迪朕躬匡弼國政者所言果是即與採用如有未當必不加罪毋得浮泛塞責欽此○又題準言官糾劾實指姦貪是其職掌若結黨挾私肆行陷害者反坐○十三

年

諭科道為耳目之官職在察姦剔弊凡大姦大惡從未經人糾劾者果有見聞即據實直陳不許徇私黨比

撫拾塞責將人已糾叅之事勦襲妄陳欽此○十八
年題準文武大臣果繫姦邪小人構黨為非擅
作威福紊亂朝政致令膏澤不宣災異迭見但
有見聞不避權貴具疏彈劾內外各衙門大小
官有不公不法等事皆得糾劾其糾舉之事須
明注年月指實陳奏若繫機密重事實封
御前開拆並不許挾私苛求泛言塞責○又題準官
民果有冤枉許赴院辨明除大事奏

聞外小事立予裁斷或行令該督撫覆審昭雪○又
題準言官題奏應密不密者罰俸六月○康熙
九年題準言官列款糾叅貪婪官吏有一二事
審實者免議若審問全虛及條陳事件隱含譏
刺或不據實回奏或叅官員老病衰庸涉虛者
皆降二級調用○十五年議準言官條陳譏刺
及回奏不實或凡事不據實陳奏或並無可據
稱風聞具題者降一級調用○三十一年

諭國家設立言官職司耳目一切吏治民生得失利弊
皆宜殫思極慮據實直陳近見滿漢科道官建白甚
少殊非朕責望言路之意嗣後應各矢公忠研求時
務凡有可以裨益國家之事悉據所見奏聞以竢採
擇但不得懷挾私情紛更定例勒襲陳言浮泛塞責
其有真知灼見應糾劾者即行叅奏亦不得暗受囑
託代人報復苛責細事希圖傾陷欽此○三十六年
諭國家設立都御史科道官以建白為專責所以達下

情而祛壅蔽職任至重使言官果能奉法秉公實心
盡職則閭閻疾苦咸得上聞官吏貪邪皆可釐剔故
廣開言路為圖治第一要務近時言官奏疏寥寥間
有入告而深切時政從實直陳者甚少此豈委任言
路之初指乎嗣後凡事關國計民生及吏治臧否但
有確見即應指陳其所言可行與否裁酌自在朝廷
雖言有不當言官亦不坐罪自皇子諸王及内外大
小官有所為貪虐不法並交相比附傾軋黨援理應

糾舉之事務必大破情面據實指叅勿得畏怯貴要
瞻徇容隱即朕躬有失亦宜進言朕決不加責其有
懷挾偏私藉端傾陷者朕因言察情隱微自能洞悉
凡屬言官尚各精白乃心力矢忠謹以無負朕殷切
責望至意欽此○三十九年

御製臺省箴臺省之設言責斯專寄以耳目寧取具員
通明無滯公正無偏黨援宜化畛域宜捐洞達政體
斯曰能賢古昔諍臣風規凜然訐謨謹論垂光簡編

朕每覽繹如鑒在懸居是官者表裏方直精白乃心
充廣其識國計民生臧否黜陟凡所敷陳敬將悃幅
風霜之任以懲姦慝搏擊之威以儆貪墨毋撫細務
苟塞言職毋紛成憲妄逞胸臆書思入告當宁對揚
沽名匪正營私孔傷或藏嫌怨謬為雌黃受人指囑
尤為不臧形諸奏牘有玷皂囊職司獻替亟宜審詳
敬爾在公風紀巖廊辭箴用勗誕告聯常○雍正元

年

諭朕仰承大統遵守成憲首以求言為急科道諸臣原為朝廷耳目之官與朕躬最親與國家最切凡有所見自應竭誠入告今雖備位臺垣即將來之公卿大吏為科道時不能盡言則日後官至大僚豈能期爾建白乎今後各科道每日一人上一密摺輪流具奏或二三人同日具奏一摺一摺止言一事無論大小事務皆可據實陳之即或無事可言摺內亦必申明無可言之故具摺後在外候旨或召進面見或令且

退所言果是朕即施行或未甚切當朕亦留中不發
決不令一人知之倘有徇私挾讐顯繫情弊巧為瀆
奏者亦不能惑朕之耳目也密摺不許人叅酌如有
漏洩或同僚中知而言之則同僚即可據以密聞朕
將兩人之摺合驗情事能隱諱推諉乎至於有面奏
廷諍或彈劾權要或更革弊端不妨仍照例露章奏
聞朕亦不拒禁爾諸臣其敬承明諭各抒忠悃無負
朕懸軫設鐸之意欽此○又

諭外任旗員受該旗都統叅領及五旗本王恣意需索者許本官據實封章密詳督撫轉奏倘督撫瞻顧容隱許本官封章揭都察院轉為密奏倘不為奏聞即各御史亦得據揭密奏務期通達下情以除積弊欽

此○又

諭勘合之外有多索一夫一馬者許前塗州縣據實揭報都察院糾叅欽此○又議準大臣為小臣之表率若屬官簞簋不飭虧空錢糧者多即繫上司不

能以清操為率盜賊繁多諸務廢弛即繫上司不能以勤慎為率皆許科道於年終察實題參

○二年奉

旨以六科隸都察院○又奉

旨凡科道露章必候朕御門聽政之日進奏在各部院奏事之後陳奏○又

諭諸王貝勒屬下人繫累世効力舊人或念其先世奉養之恩見幼主有過直言規諫或因需索不遂並聽

讒佞之言將効力之人妄加殘害藉端送部治罪則
忠直之輩人人箝口而讒佞小人轉得任意橫行矣
嗣後如此等曾在其先世効力之人幼主無故尋釁
妄行陷辱藉端送部治罪者準其聲明寃抑或赴宗
人府或赴都察院呈訴該衙門奏聞詳審果繫寃情
或撥於別旗或撥於他王門下若所訴盡誣加等治
罪欽此○又

諭外省督撫有懷私背法逞威等事給事中御史等受

其請託賄賂為之徇隱經朕聞知將都察院堂官一
并議處至上彈劾本章或有畏難之心亦未可定將
本章封固抵稱叅本不必聲明姓名事由欽此○三
年

諭朕為天下臣民之主一夫不獲尚厯朕懷豈可令郡
縣司牧枉受冤抑乎朕屢降諭旨令督撫秉公體卹
屬官尚恐有冤抑之人嗣後道府以下知縣以上各
官有實在冤抑被叅降革者令赴都察院具呈確察

原叅緣由覈實具奏其並無冤抑實有罪愆人品不端才力不及之人妄行具呈者亦必重治其罪欽此

○四年議準直省州縣交代舊任官虧空各上司逼勒新任官接受者許被勒之人直揭部科代為陳奏其有干連督撫者將具揭之人與虧空之人押赴來京交與都察院察審明確將該督撫一弁從重議處如繫誣揭交與刑部加倍治罪至出揭之人調任別省該管上司有因其

從前揭報之故多方搜求藉端誣陷者該員赴
院呈辯果繫叅處冤抑將該上司交部議處如
誣辯不實加倍治罪○七年

諭科道乃朝廷耳目之官專以進言為職朕令其於露
章之外復行密奏者蓋欲其時進讜言匡朕不逮有
益於吏治民生也既繫密奏則當謹慎不謀於人不
洩於外方無忝於事君之義而不愧言官之任嗣後
倘有密奏之事朕未將本人姓名發出而本人自行

露洩或私自存橐者一經發覺朕必嚴究重治其罪

欽此○十三年十一月

諭往者

聖祖仁皇帝特製臺省之箴以重言責

皇考世宗憲皇帝諭旨亦諄諄及之洵以耳目之司乃
國是所由彰官常所由肅也朕以藐躬纘承丕緒
一日萬幾常恐措置失宜以負

皇考付託之重繩愆糾謬正爾諸臣得自竭其忠誠之

會也中外大臣或有詭法行私及昏庸不能任職者近者實跡有徵遠者輿論不協皆宜據實彈劾以廣朕之聰明而近觀諸臣所奏大率毛舉細故無關體要朕以實心求言而專司言責者仍以虛文塞責無乃內負夙心而外慚清議乎其各自砥礪凡有關於國政民依者知無不言無或畏蒞若仍以不急之務漫充奏牘或其人已自敗露而後撫拾其非又安用此至於懷私挾怨受人指囑互

相攻訐乃

皇祖之箴所謂尤為不臧者有或蹈此乃自貽伊戚也
勉之慎之欽此○又

諭朕御極之初一時見聞未徧恐不能周知天下之
庶務欲開言路以期集益廣思爰遵

皇考時舊例令滿漢文武大臣官員科道等輪班條奏
使各抒已見用備採擇茲者條奏已將一週其中
固有通達治體可以見諸施行之事而胸無確見

真知因迫於班次已屆勉強湊合支贅成篇者亦復不少自今一輪之後不必拘定班次倘有所見隨時陳奏此朕切望廷臣嘉謨入告實有裨於政治之意並非奏牘繁多厭於披覽也欽此○乾隆

元年

諭國家設科道官原以發抒忠悃隨時獻替為專職而進諫之道莫大乎繩愆糾謬上佐君德其規切用人行政指陳吏治民生者次之此古名臣之所

以志在格君而嘉猷碩畫有造於國是民依也朕
近敬閱

世祖章皇帝實錄見當時言官奏疏尚有骨鯁謬謬之
風竟能直指君德之得失而不顧一己利害之私
朕輒改容誦之以為我朝人物挺生忠良之佐匪
躬之節未嘗遠遜古人也朕御極以來求言之詔
屢下而司諫之臣從未聞有忠言讜論可藉以為
啟沃之助者計其封章條奏不過摭拾細事苟且

塞責即欲求其切中政體痛斥官方之言尚不可
得何論上及朕躬塞違昭德以盡納誨之實乎夫
朕之一身豈無闕失正賴廷臣直言以襄不逮即
云大德不踰而日理萬幾或發號施令之失其宜
或慶賞刑威之過其則或進退黜陟之乖其分或
輕重緩急之爽其衡皆朕所不能自信者乃朕誠
心求之而諸臣不能以誠心應之則諸臣不能辭
曠職之咎也繼自今大臣暨科道等務以古處自

期各矢忠蓋為上為德為下為民悉盡言無隱以
修臣職以繼芳踪毋使先正氣骨獨自擅美於前
庶稱朕拳拳冀望之心至本朝定鼎以來從前臣
工章疏有忠讜剴切卓然可傳者著內閣翰林院
委官精選進呈刊刻以垂示將來俾後進奉為模
楷其入選章疏諸臣內有素行端純完名全節者
準入祀賢良祠用昭朕崇禮直臣風勵百僚之意

欽此○又

諭朕即位以來屢下求言之詔至再至三出於誠切
並非尚納諫之虛文誠以朕躬闕失無由自知必
賴直言匡正而隨時納誨者乃臣子之大義苟有
所見即當直陳使言之果當朕當即改易可收轉
圜之益言之不當朕亦得以已意明白剖示釋其
疑心亦開誠布公之道也惟是公私之辨不可不
嚴倘有藉直諫之名以自行其私妄冀惑亂朕聽
亦斷不能逃朕之洞鑒也欽此○又

諭人臣奏事理宜慎密若叅劾既非露章而用封奏
尤不當漏洩於外以自作威福欽此○又奉

旨嗣後倘有被步軍統領衙門番役等騙害者準本
人赴刑部都察院控告該部院即據實奏聞朕必
將番役嚴審治罪不少寬貸○二年

諭國家設立科道專司建言之責必心本無私又能
通達治理乃為無忝厥職若識見雖未明通而居
心樸誠則言雖愚戇尚無害於事理朕亦鑒其忱

惘而優容之惟胸懷愛憎之私藉奏章以展其巧
詐者則有玷臺垣國法不可以輕恕即如並未深
悉地方民情而奏稱某地某事甚善而承辦之人
已暗受其推薦奏稱某地某事不善而承辦之人
已暗受其中傷是其敷陳之時並未據實秉公匡
襄政務而言在於此意注於彼其居心尚可問乎
近見科道中此等習氣頗不能免亦難逃朕之洞
鑒科道官當捫心自問如稍有愛憎之私未泯於

中者各宜猛省悛改毋蹈罪戾欽此○又

諭從來言官陋習相沿多由迎合若人主意在綜覈
率刻意吹毛求疵巧避瞻徇之迹而置君德於不
問若人主意在樂聞已過則又往往於朝廷之政
事吏治之得失不一言及甚有臣工不能靖共羣
僚或植黨援曾不敢一指摘以遠嫌避害惟事撫
拾陳言以自沽能正君心之名是其居心之陰巧
乃國家之大蠹也朕孜孜求治常恐不及使偶有

闕失言官果能切實指陳朕自樂於聽受即大臣
中或有過肯果能據實彈劾亦足為用人鑒戒若
徒勦襲膚辭則史冊具在盡足披覽何用伊等喋
喋陳奏乎倘錯會朕意轉生畏蒞之念則又不知
朕推誠布公之心者也欽此○三年

諭朕令科道條陳事件原許各陳所見以裨政治雖
所陳奏不能盡合機宜且往往有揣摩朕意有心
迎合者此等固不足採但伊等職司言路條陳既

多其中豈無可行之事朕勅交九卿會議爾等自宜虛公斟酌不可稍有偏執欽此○四年奏準本院職司稽察凡有冤枉均得陳奏準理嗣後候補候選及曾經議處官弁如有應行呈明情節許赴吏兵二部具呈交與該司將應準應駁緣由詳加察覈逐款明晰批示分別辦理果有實在寃抑應令其親自赴院具呈察明應行準理者即行文調取該部辦理原案及一應定例如

實繫舛錯即為奏請更正該部堂司官如有辦理未協亦即奏明請

旨察議倘有營私受託等弊經院訪確即行參奏○
八年奉

旨嗣後有交部發議事件科道不待部覆參差具奏者該部於議覆本內將伊等意見參差之處聲明請旨○十三年奉

旨各衙門京堂屢經酌定仍不免參差僉都御史有

漢官無滿官應作何裁改著該部定議具奏遵

旨議準裁僉都御史埃員闕時停止奏請

簡用○又題準御史原繫言官凡遇有應行奏

聞事件各御史果訪聞確切不必拘定省分衙門仍

聽隨時據實陳奏

欽定大清會典則例卷一百四十五

欽定四庫全書

欽定大清會典則例卷一百四十六

都察院二

一六科接本順治年間定凡紅本

批發到內閣日以給事中一人赴內閣祇領分發各科○雍正六年議準嗣後紅本到內閣不拘滿漢給事中一人親赴內閣祇領○十三年議準嗣後九卿會議定稟畫押之後令主稟之部院

膳錄副臺鈐蓋堂印送於應稽察之科收貯候命下之日該科將副臺與紅本覈對倘有私行更改以致不符者本科叅奏○乾隆十三年

諭內閣每日進呈本章朕批發後由六科親領發鈔以昭慎重乃近來該給事中等怠忽成習竟有不親身祇領委之筆帖式等代行者往往不待接本先已散去至次日始行發鈔朕所聞如此夫本章關係緊要承領乃科臣專責似此因循玩愒必致

貽誤朕姑寬其既往著大學士等傳旨申飭將來
若不親身承領或發鈔遲延必嚴加議處大學士
等亦宜留心稽察如有仍蹈前轍者即行叅奏欽
此

一發鈔順治初年定凡本章

命下事屬某部院者由某科即日鈔清漢文

諭旨發交某部為正鈔如一事關涉數處者將本章
送於別科轉發為外鈔原領本章各貯本科年

終彙繳內閣○又議準凡內閣發出密本由該科登號原封送部取承領官職名附於號簿該部辦理畢仍密封送科○康熙十七年議準紅本已奉

旨到科未經到部有豫鈔洩漏者將本科給事中議處洩漏之人交刑部治罪○雍正元年覆準凡書吏提塘京報人等除紅本

上諭外如有訛造無影之辭者本科給事中察拏治

罪○五年議準凡紅本科鈔闕繫甚重令承辦
官詳悉校對敬謹奉行如有增減錯漏繫何衙
門所奉

諭旨將承辦校對官照錯誤本章例議處○乾隆六
年議準凡

特降諭旨及

批發章奏到內閣繫該部承鈔辦理者令該科同赴
內閣鈔出並傳知都察院暨衆科道

一史書錄書順治初年定凡紅本發鈔後本科別錄二通供史官記注者曰史書存貯科署以備編纂者曰錄書敬謹校對鈐蓋印信史書送內閣錄書分貯六科○雍正八年

諭史書錄書每年令滿漢翰林各二人悉心稽察專司其事倘有玩忽潦草之處據實奏聞如徇隱不奏察出一并議處欽此

一封駁順治初年定凡部院督撫本章已經奉

旨如確有未便施行之處許該科封還執奏如內閣
票籤批本錯誤及部院督撫本內事理未協並
聽駁正

一陳奏順治初年定給事中與御史同有進言
之責凡

朝廷政事得失民生利弊以時條上百官有姦貪
劣蹟亦得據實糾彈

一注銷吏科稽覈吏部順天府戶科稽覈戶部

禮科稽覈禮部宗人府理藩院太常寺光祿寺
鴻臚寺國子監欽天監兵科稽覈兵部太僕寺
鑾儀衛刑科稽覈刑部通政使司大理寺工科
稽覈工部各衙門所辦之事每月兩次造冊送
稽覈之科注銷依限完結者開除限內未完及
逾限有因者於注銷本內聲明無故逾限者指
叅各於月杪繕本具題○乾隆十四年奏準都
察院向無注銷之案稽覈歸於刑科

一京察順治十三年議準凡各衙門京察冊籍

定期於三月十五日以前封送吏科吏科準吏

部考功司移會會同河南道

今京畿道

各封門察覈

應移詢者密封移詢應改正者即行改正屆期

過堂吏科掌印給事中滿漢各一人同河南道

掌印滿漢御史赴吏部公座會同考察公定去

留繕本具題

一大計順治四年議準凡直省督撫送到冊籍

由吏科會覈具題

一文職畫憑順治初年定外任司道以下各官
命下五日内吏部文選司繕寫文憑用印送吏科填
限吏科定期令各官齊集畫憑依限填注限十
日内送部知縣以上行一揖禮知縣以下均跪
如不赴科畫憑逾兩月者將憑送吏部覈銷○
又議準經歷以下雜職等官皆寄憑與該督撫
給發該員領憑赴任取具地方官文結報明吏

科存案○康熙五年議準官員畫憑不到者吏科即移會吏部察覈有無事故如一月內呈明事故到部者知照本科準其補畫文憑如無事故又未呈明違一月以上者罰俸一年亦準其補畫違兩月不到者革職○八年議準畫憑官繫候補候選者須覈其投科文結如先無文結投科漢官取具同鄉京官印結滿官取具該旗印結捐納出身者驗明捐照方準畫憑○又奏

準在外推升各官扣除交代日期有錢糧者扣
兩月之限無錢糧者扣一月之限在籍候選佐
雜各官扣除督撫驗看日期順天府扣一月之
限奉天扣四十五日之限其餘直省皆扣兩月
之限在外題補教職亦扣限兩月考試驗看以
上扣除日期皆填入憑內鈐印送部轉發○又
題準凡官員領憑到任後該巡撫布政使將原
領文憑並到任日期按季繳報有違限者由科

題叅○十一年題準官員赴任在塗有耽延事
故及患病者取具中塗地方官印結咨報吏科
免叅至在外推升各官領憑後如原任內錢糧
盜案未完或候交代及患病以致違限者督撫
藩司將情由咨部改限令其赴任仍知會吏科
稽覈○雍正七年覆準凡官員領憑赴任以
京師至該省扣算限期但各省會城及所屬之府
治距京遠近不一其憑限日期自應詳加分別

除順天奉天保定等處原限繫將各府計算與驛站相符無庸增減其餘各省憑限將自京至該省會城及府治驛站分別遠近酌量增減其正八品以下在籍候選及在外推升各官文憑封發該督撫驗看給發者將發憑到省日期逐一扣除外應以得官省分與原籍原任之地比較遠近酌定憑限一并造冊移送吏科依限填注嗣後自

京師領憑赴任者順天限十日奉天限三十日直隸限二十日山東之濟南兗州東昌青州限三十日登州萊州限四十日山西之太原潞安汾州大同寧武朔平限三十日平陽澤州限三十日蒲州限四十日河南之開封歸德彰德衛輝限三十日懷慶河南限三十五日南陽汝寧限四十日陝西之西安延安限五十日鳳翔漢中限五十五日甘肅之平涼鞏昌限五十五日

慶陽寧夏臨洮限六十日西寧涼州甘州限七十日江蘇之江寧常州鎮江限四十五日淮安揚州限四十日蘇州松江限五十日安徽之安慶寧國限五十五日池州太平廬州限五十日徽州限六十日鳳陽限四十日浙江之杭州紹興寧波限五十五日湖州嘉興限五十日金華衢州嚴州限六十日溫州處州台州限六十五日江西之南昌饒州廣信建昌南康撫州臨江

瑞州袁州限六十日九江限五十五日吉安限
六十五日贛州限七十日南安限七十五日福
建之福州興化泉州邵武限八十日延平建寧
汀州限七十日漳州福寧限八十五日臺灣限
百有十日湖北之武昌漢陽德安襄陽限五十
日安陸鄖陽黃州荊州限五十五日湖南之長
沙常德限七十日岳州限六十五日寶慶永州
限八十日衡州辰州限七十五日四川之成都

限八十日寧遠夔州限八十五日順慶限九十
日敘州重慶限九十五日保寧限百日雅州限
百有五日龍安限百有十日廣東之廣州肇慶
限九十日韶州南雄限八十日惠州限九十五
日高州限百日廉州雷州限百有五日潮州瓊
州限百有十日廣西之桂林平樂限百日柳州
慶遠梧州潯州限百有五日思恩南寧太平泗
城限百有十日雲南之雲南臨安楚雄澂江廣

西曲靖武定東川烏蒙限百有十日姚安大理
景東順寧鶴慶蒙化永昌永北元江開化限一
百十有五日廣南麗江威遠鎮沅限百二十日
貴州之貴陽思南鎮遠都勻平越安順南籠遵
義限百日思州限九十五日石阡黎平限八十
日銅仁限九十日威寧限百有五日八品以下
在籍候選及在外推升例不引

見官員將文憑封發該省督撫驗看給發者除將發

憑到省日期逐一扣算外應以得官省分與原籍原任地方比較遠近定限○順天至奉天山東山西河南均限三十日江蘇湖北陝西均五十日安徽浙江均五十五日江西六十日湖南甘肅均七十日福建四川均八十日廣東廣西均九十日貴州百日雲南百有十日○奉天至順天直隸均限三十日山西五十日山東河南陝西均六十日湖北七十日江蘇安徽江西浙

江甘肅均八十日湖南九十日福建四川均百
日廣東廣西均百有十日雲南貴州均百二十
日○直隸至奉天山東山西河南均限三十日
江蘇湖北均五十日安徽五十五日浙江陝西
均六十日江西湖南甘肅均七十日福建四川
貴州均八十日廣東九十日廣西雲南均百日
○山東至順天直隸山西河南江蘇安徽均限
三十日浙江湖北均五十日奉天江西陝西均

六十日福建湖南均七十日甘肅七十五日四
川廣東貴州均八十日廣西九十日雲南百二
十日○山西至順天直隸山東河南陝西均限
三十日甘肅四十日奉天湖北均五十日江蘇
安徽江西湖南均六十日浙江四川均七十日
福建八十日貴州九十日廣東廣西雲南均百
日○河南至順天直隸山東山西江蘇安徽陝
西均限三十日湖北四十日江西甘肅均五十

日奉天浙江湖南均六十日貴州七十日福建
四川均八十日廣東廣西雲南均九十日○江
蘇至安徽限二十日山東河南江西浙江湖北
均三十日順天直隸湖南均五十日山西福建
陝西四川貴州均六十日奉天甘肅廣東廣西
均八十日雲南九十日○安慶至江蘇限二十
日山東河南江西浙江湖北均三十日直隸湖
南均五十日順天五十五日山西陝西福建四

川均六十日貴州七十日奉天甘肅廣東廣西
均八十日雲南九十日○江西至江蘇安徽福
建浙江湖北湖南均限三十日廣東四十日河
南五十日順天山東山西四川貴州均六十日
直隸廣西均七十日奉天八十日陝西雲南均
九十日甘肅百日○福建至江西浙江均限三
十日江蘇安徽湖北廣東均六十日山東湖南
均七十日順天直隸山西河南廣西均八十日

奉天四川貴州均百日陝西甘肅雲南均百二十日○浙江至江蘇安徽江西福建均限三十日山東湖北均五十日順天直隸河南湖南廣東均六十日山西七十日奉天八十日陝西四川廣西均九十日甘肅貴州均百日雲南百二十日○湖北至江蘇安徽江西湖南均限三十日河南四川貴州均四十日順天直隸山東山西浙江陝西均五十日福建廣東廣西均六十

日奉天甘肅雲南均七十日○湖南至江西湖北四川貴州均限三十日江蘇安徽甘肅廣西均五十日山西河南浙江陝西廣東雲南均六十日順天直隸山東福建均七十日奉天九十日○陝西至甘肅限二十日山西河南均三十日湖北四川均五十日順天奉天直隸山東江蘇安徽湖南貴州均六十日江西浙江雲南均九十日福建廣東廣西均百二十日○甘肅至

陝西限二十日山西四十日河南湖南均五十日四川六十日順天直隸湖北貴州均七十日山東七十五日奉天江蘇安徽均八十日江西浙江雲南均百日福建廣東廣西均百二十日○四川至湖南貴州均限三十日湖北四十日陝西雲南均五十日江蘇安徽江西甘肅廣西均六十日山西廣東均七十日順天直隸山東河南均八十日浙江九十日奉天福建均百日

○廣東至廣西限三十日江西四十日福建浙
江湖北湖南貴州均六十日四川七十日山東
江蘇安徽均八十日順天直隸河南雲南均九
十日山西百日奉天百有十日陝西甘肅均百
二十日○廣西至廣東限三十日湖南五十日
湖北四川貴州均六十日江西七十日江蘇安
徽福建雲南均八十日順天山東河南浙江均
九十日直隸山西均百日奉天百有十日陝西

甘肅均百二十日○雲南至貴州限三十日四
川五十日湖南六十日湖北七十日廣西八十
日河南江蘇安徽江西陝西廣東均九十日直
隸山西甘肅均百日順天百有十日奉天山東
福建浙江均百二十日○貴州至湖南四川雲
南均限三十日湖北四十日河南江蘇江西陝
西廣東廣西均六十日安徽甘肅均七十日直
隸山東均八十日山西九十日順天福建浙江

均百日奉天百二十日定限填憑給發至官員
赴任呈繳文憑時該布政使司覈明部科印信
限期相符者即行咨繳或有油痕水跡破損等
項不得駁回倘書吏藉端需索許本官詳報該
上司究處○十三年議準凡官員赴任有中塗
患病及風水阻滯實情如違限一二月不及取
具地方官印結者督撫移咨吏科免其題叅若
違限至三月以上果有阻滯實情取有地方官

印結報科亦免題叅如無地方官印結即行題
叅○十六年覆準正八品以下微員除在籍候
補候選者仍照向例於得官後將文憑封發本
省驗看給發外其在京候補候選得官者奉

旨後吏部移會吏科畫憑亦準其由京定限給憑赴
任○又議準由京之各省新設府州程限山東
之泰安武定等府均限三十日曹州府限三十
五日沂州府限四十日山西之遼沁忻保德平

定代等州均限三十日隰州限三十五日解絳
吉等州均限四十日河南之陳州府及許汝等
州均限三十五日陝光等州均限四十五日陝
西之同州府及商鄜等州均限五十日榆林府
綏德州均限四十日邠乾等州均限五十五日
興安州限六十五日甘肅之蘭州府階州均限
五十五日秦州限五十日肅州限八十五日江
蘇之徐州府海州均限四十日通州限五十日

太倉州限五十五日安徽之滁六安和等州均
限五十五日泗州限五十日潁州府限四十五
日廣德州限六十五日福建之永春州限九十
日龍巖州限百日湖北之宜昌府限七十日施
南府限八十五日湖南之澧州限六十五日永
順府限八十日沅州府及桂陽郴等州均限八
十五日靖州限九十日四川之潼川府綿州均
限八十日眉邛茂等州均限八十五日嘉定府

資州均限九十日瀘州限九十五日忠達等州
均限一百十有五日常陽州限百二十五日廣
東之羅定州限百有五日常應連等州限百有
十日廣西之鬱林州限百二十五日鎮安府限
百三十日雲南之昭通府限百有十日普洱府
限百二十日貴州之大定府限百有十日○又
定違限各官據直省撫藩四季冊報吏科於六
月十二月兩次察覈其違限不及一月者免議

違限一月以上至數月者由科察其違限緣由
凡有中塗患病者取具地方官印結覈其患病
月日扣除不算外如仍有違限照例摘叅○又
定凡違限各官如有事故兩季報冊內未及詳
細聲明者由科於題本內聲明行訊候覆到日
附於下次補叅○又定凡在京領憑尚未起程
患病者赴吏科呈明展限倘病久不能起程由
科批該坊官驗實出結報科至到任以後該省

仍於冊內聲明緣由吏科扣除計限

一支領財物順治初年定凡在京部院各衙門
支領戶部銀物各衙門每月造冊送戶科察覈
如有浮冒外錯者指叅

一直省錢糧奏銷順治初年定凡直省解戶部
錢糧完欠及田賦雜稅兵馬錢糧各項奏銷冊
有蒙溷舛錯者由戶科指叅○又議準凡田賦
雜稅奏銷由布政使司造冊呈巡撫轉送兵馬

錢糧奏銷由提標協營造冊呈總督轉送均由
戶科察覈每年於五月內送到如不能依限督
撫題請展限知會戶科○十一年議準直省錢
糧布政使司已給批收即將解過款項數目彙
造清冊送戶科磨對○十七年題準直省錢糧
每歲終該撫造具奏銷冊開載田賦款項數目
並造具考成冊開列已未完數目送戶科察覈
○康熙十一年題準州縣奏銷冊開解支之數

由單列徵收之款每有冊單總散數目不符嗣後奏銷冊務與由單相符至實徵原額起存完欠藩司總數務與州縣細數相符送戶科察覈○乾隆十七年奏準江蘇等省向例奏銷田賦皆有隨本黃冊惟陝西甘肅廣東廣西雲南貴州六省獨無黃冊嗣後令各該撫一例造冊送科至冊籍關繫銷算不得任意遲延隨便郵遞嗣後奏銷黃冊務須隨本分送部科以便覈銷

一直省錢糧交盤順治初年定凡藩司交代必將其任內收放錢糧交盤出結造冊呈詳該撫具題送戶科察覈○康熙六年議準州縣錢糧以欠作完督撫司府扶同捏報許接任官逐項清理如起解無批存留無銀即直揭部科以憑題叅○雍正元年奉

旨嗣後署印官虧空如督撫等逼勒接任官收受著接任官直揭部科即為奏聞

一易知由單順治十年題準每年由單令於十一月下旬報送部科如有遲延題叅議處○十二年題準由單報送部科量地遠近酌定日期直隸限十二月杪山東山西河南限正月杪江南浙江限二月中江西湖廣陝西限二月杪福建廣東限三月中四川廣西限三月杪各送部科如有遲延題叅分別議處○十六年議準州縣由單申府用府印鈐蓋呈報部科覆覈如有

私派飛灑等弊戶科題叅○康熙十六年題準
長蘆各場竈戶正賦以康熙十八年為始刊刻
由單散給竈戶歲由運司分送部科察覈○二
十七年題準各省由單停止刊刻仍將賦役全
書送科備考遇有修輯隨時解送

一秋成分數乾隆元年議準督撫奏報年歲收
成分數除隨時奏報外再將通省之夏收秋收
分數繕兩本具題交部科察覈

一漕糧奏銷順治初年定凡漕糧兌完該管糧道將開幫日期呈報隨造具各幫兌交糧米數目清冊呈送漕運總督該督具題以冊送戶科由科同全單磨對

一漕糧全單順治初年定凡起運漕糧白糧數目由漕運總督辦給全單付於運官該運官抵通按單交卸坐糧廳出具收完呈文該運官將全單呈文並送戶科呈驗由科覈對數目相符

鈐印給發

一奏繳糧斛冊順治初年定凡京通各倉監督
每歲收放米豆數目造具舊管新收開除實在
四柱清冊呈送總督倉場侍郎具題以冊送戶
科磨對

一奏繳漕白糧冊順治四年定凡坐糧廳監督
每歲抵通漕糧白糧數目造具清冊呈送總督
倉場侍郎具題以冊送戶科磨對

一鹽課考覈順治三年議準凡運司提舉司等官一年合辦鹽課於歲終將已未銷鹽引若干已未完鹽課若干造冊呈送鹽政鹽政具題以冊送戶科注銷俟鹽差任滿具題聽都察院考察外仍造具總冊送科稽覈○康熙五十年議準各省運司運同運判提舉凡遇交代造具冊結由鹽政巡撫送科察覈至雲南貴州四川甘肅等省未設運司其管理鹽課各官交代之時

亦造冊由巡撫送戶科察覈○乾隆七年議準
各省鹽場大使并大使交代之時造具冊結由
鹽政巡撫送戶科察覈

一關差領批順治元年定凡戶部所屬天津山
海臨清揚州蕪湖潯墅鳳陽淮安西新江海北
新浙海九江贛閩海太平粵海各關撰給精微
批文由戶部送科掛號具文送於內閣填注職
名用

寶戶科給事中引監督於

午門外跪領按程定限並回繳日期○康熙十一年題準凡戶部關差回京之日原領精微批文送戶科銷號轉繳內閣違限一月以內者免議一月以外者參處○雍正元年定山海關專差監督照例領批其餘關差交與巡撫管理不必領批○又定應領批之關差如由外任補授者均不領批凡批內注限天津山海關限二十日

臨清關限二十五日鳳陽關限三十二日淮安
許墅揚州江海關限三十五日北新蕪湖西新
浙海關限四十日九江關限五十日贛閩海關
限六十日太平粵海關限七十日

一關差考覈順治初年定凡戶部關差監督赴
科親領四季印簿令本商自填納稅數目按季
送科差滿造具總冊戶科移取戶部紅單磨對
如有舛錯違限者題叅○康熙二十五年議準

嗣後戶部關稅銀四季報解其戶部紅單戶科
印簿候差滿日彙報停其按季呈報○五十三
年議準臨清關交與巡撫管理其季簿總冊統
於一年彙送停其按季呈報○五十五年議準
北新鳳陽天津關皆交巡撫管理應照臨清關
例停其按季冊報○雍正元年覆準潁墅揚州
西新蕪湖九江贛太平粵海關海關皆交巡撫
令地方官管理其所收稅課數目仍按季送科

一年任滿造具總冊送戶科磨對○乾隆元年
奏準臨清關仍交巡撫管理北新關交與織造
管理天津關交與鹽政管理鳳陽關交與鳳陽
府知府管理其所收稅課數目均照康熙年間
之例統於一年彙報許墅關交與織造管理西
新關交與布政使管理九江粵海關專差監督
閩海關交與將軍管理蕪湖太平贛揚州關仍
交巡撫管理其所收稅課數目均照雍正年間

之例四季并一年造報○又定戶部關差或巡撫等官兼管或由外任調用或奉

旨留任均備文請領四季印簿

一直省解部批文順治十六年題準解部錢糧批文冊籍各官當堂定限籤發如假手吏胥空懸小日任意違限揶補年月扶同作弊經部科察出將解役送刑部究擬○康熙四十九年題準各省解部鹽課關稅錢糧該御史監督皆具

批送科領解官交銀訖將部中所給實收送戶
科察驗各省督撫織造將解部一應錢糧並顏
料段疋等項先行移會具硃限批文送科竣交
完之日即將部中所給實收送科察驗發批如
有違限不到及遲延不完或繫包攬需索侵漁
或繫解官挪移挂欠由戶科覈叅送部治罪○
雍正七年議準凡直省解戶部錢糧及各項物
件皆有批迴解官於掣批之後即將所掣批迴

赴戶科磨對○乾隆三年議準一應領解官役
例應照依批內硃限日期齎批投報近來各處
領解繳引竟有不依硃限赴科投批告驗者是
否中塗逗遛有無別項影射情弊均未可定嗣
後務嚴飭官役照依硃限投繳倘有違誤察究
懲治○十二年覆準嗣後解官解役投遞一應
文冊承領一應簿批須親身徑投戶科當堂領
遞不得假手書吏致滋弊端或官役至京偶有

疾病事故許將到京身寄何處令的當人具呈
由科覈明準其代投代領如有書吏在外藉端
勒索欺詐者立即指告以懲不法

一歲科學冊順治八年題準學政以到任日期
為始歲考限一年考完每三月將考過生童名
數報禮科察覈如有違限溷冒等弊禮科題叅
○康熙十二年議準凡生員緣事黜革及審明
開復該學政逐案造冊報科○十三年議準歲

科學冊限一年內兩次報科○二十五年題準
歲考畢造冊送禮科科考畢亦如之總計三年
任內解冊二次違限不解者題叅○四十五年
議準歲科學冊如有錯誤駁回改正倘有名數
不符及頂補等弊咨行該督撫察明題叅○雍
正元年覆準學政歲考解冊限年半報禮科科
考解冊仍限一年○二年覆準歲科兩考通計
三年內兩次造冊報科歲考解冊仍限年半科

考解冊不必定限

一歲科試卷順治八年題準學政到任即將到任日期報科以到任之日為始歲考限一年考完每三月解卷一次科考亦如之禮部會同禮科磨勘○九年題準歲科試卷優等以大學五名小學三名解科磨勘其有詭僻幽險割裂補綴者題叅分別議處○康熙十三年議準生童試卷傳送禮科磨勘○雍正十三年議準凡歲

科考前列十名試卷解部會同禮科磨勘○又
議準凡歲科前列十名試卷除大學遵照解送
部科磨勘外其中小各學應令該學政臨時將
不滿十名之數聲明盡數解送磨勘

一鄉試卷磨勘順治初年定凡直省鄉試硃墨
卷均依限解部會禮科磨勘○康熙四十年覆
準交九卿詹事科道磨勘○乾隆元年議準嗣
後直省鄉試硃墨卷解部科道暨中贊等官會

同磨勘

一軍政順治十一年題準每閱五年舉行軍政
直省提鎮以下千總以上凡經制員弁該督撫
嚴加考覈填注考語造冊密送兵科察覈其賢
不肖之尤者並令開具事實定限於十月內送
到如違限不到及考語含糊參差者題叅○康
熙六年題準嗣後應舉行軍政之年在內冊籍
限三月二十日內直省限十月二十日內各送

兵科察覈○二十六年題準凡軍政冊籍到日
兵部會同兵科詳看完結具題○又題準凡軍
政不入舉劾官員停其造冊送科○雍正元年
議準凡軍政不入舉劾官員逐一填注考語造
冊送覈

一武職畫憑順治初年定凡推補副將叅將游
擊都司守備千總各官兵部職方武選兩司送
到限票由兵科定期令各官齊集畫憑依限填

注送部自副將至守備行一揖一跪三叩禮千
總以下行一跪三叩禮如三次不到將限票移
送兵科銷訖仍將本人題叅○又議準凡武職
選後不遵限赴兵科畫憑者照規避例革職○
康熙三年議準武職赴任每日限行六十里○
又議準凡武職在外推升不送部引

見者兵部將限票送科填限仍送部行督撫轉發該
員赴任○十一年題準凡武職各官赴任在途

有耽延事故及患病者取具中塗地方官印結
咨報兵科免叅○雍正十三年議準凡武職赴
任有中塗患病及風水阻滯實情如違限一二
月不及取具地方官印結者提鎮移咨兵科免
其題叅若違限至三月以上果有阻滯實情取
具地方官印結報科亦免題叅如無地方官印
結即行題叅○乾隆八年議準嗣後武職赴任
各官自

京師到該省會城及府治驛站分別遠近悉照文職之例其在外推升各官由原任地方赴新任者應以新任省分與原任地方比較遠近酌定憑限均照吏部文職到任印冊鈔錄鈐印存案一應文憑均照冊填限給發

一功加人員雍正三年覆準凡功加人員令督撫提鎮轉行該營協州縣將該員三代履歷年貌籍貫並取具千把州縣等官印結送兵科稽

考

一武生考試順治初年定凡直省學政報明到任日期後將考過武生童名數按期造冊送兵科察覈如有違限遲誤及濶冒情弊由兵科題

參

一官兵俸餉康熙五十三年覆準直省官兵俸餉領結不必按季責送應於奏銷前一月造冊送兵科察覈○五十五年覆準直省官兵俸餉

既於奏銷案內造冊送科察覈其文武官監放
領結停止造送

一朋椿奏銷順治初年定凡直省每年奏銷兵
馬朋椿冊籍限五月內造送兵科察覈如有浮
冒舛錯者題叅

一提塘康熙初年定凡各省坐京提塘均赴兵
科畫卯月以朔望為期○又議準凡題奏奉

旨之事下科後令該提塘赴科鈔錄封發各將軍督

撫提鎮

一驛遞奏銷順治初年定凡直省驛遞錢糧支銷數目令該撫年終造冊送兵科察覈如有浮冒舛錯者題叅

一郵符奏銷順治二年題準凡直省督撫提鎮學政鹽政等每年終將領過勘合火牌造具清冊奏繳到日送兵科察覈違例濫給者題叅○七年議準直省齎送人員皆用部發火牌驗明

方準應付如有自發紙牌索取夫馬者不準應
付違者兵科糾叅與受一同治罪○十七年議
準督撫濫用私牌及徇庇屬員不叅者兵科訪
實糾叅州縣官如將私牌申報者即與紀錄○
康熙十五年議準凡直省火牌止許齋奏叅劾
貪官巨憝薦舉大計軍政奏銷錢糧等事其平
常事務止許由驛遞送違者兵科題叅○又定
直省督撫提鎮等每年奏繳勘合火牌冊籍限

五月內送兵科察覈○又定直省奉差到京勘
合火牌由科銷號轉號送部換給仍送科掛號
違者兵部會兵科年終彙叅○又定在京奉差
及赴任勘合火牌由科掛號送部給發違者兵
部會兵科年終彙叅

一內外立決人犯奉到

諭旨刑科照例發鈔密封下刑部施行

一覆奏順治初年定

朝審情實人犯本科三覆奏

聞○雍正二年定秋審人犯亦照

朝審例三覆具奏○乾隆十四年

諭朝審情實人犯由刑科三覆奏其後各省秋審亦
皆三覆奏自為慎重民命即古三刺三宥遺制謂
臨刑之際必致詳審不可稍有忽畧耳非必以三
為節也朕每當勾決之年置招冊於旁反復省覽
常至五六遍必令毫無疑義至臨勾時猶必與大

學士等斟酌再四然後與勾豈啻三覆已哉若夫
三覆奏本章科臣匆劇具題不無豕亥且限於時
日豈能逐本全覽嗣後刑科覆奏各省皆令一次
朝審仍令三覆欽此

一 監視行刑乾隆十四年奉

旨朝審人犯著刑科給事中監視行刑

一 直省爰書順治十一年覆準凡直省重案已
結未結者令按察使司各道年終具題造冊送

刑科察覈○康熙十二年覆準凡直省人命強盜及應擬死罪等案將全招畫一開列疏內並別造清冊送刑科察覈○二十二年覆準凡直省重罪具題事情照原疏看語揭帖開送刑科覈覆外停其照疏造冊投送○二十五年覆準凡直省已結未結重案停其年終具題造冊投送○雍正四年定直省州縣原讞情罪果與律例脗合上司溷駁許承審官鈔錄原審供冊並

批駁案卷直揭刑科以憑察覈實則將上司議處虛則將屬官治罪

一刷卷順治十一年題準每年京畿道今河南道刷

卷繕造黃冊進

呈後赴刑科注銷

一贓贖順治初年定凡直省贓罰贖銀穀細數督撫於年終備造文冊送刑科察覈○康熙五十七年議準直省解部贓罰贖銀等銀批文

專投刑部免送刑科磨勘○雍正七年定直省
解部贓罰贖鍰等銀批文均投刑科磨勘○又
議準凡直省私鹽變價銀鹽政於差滿之後備
造文冊送刑科察覈

一內外工程順治十二年覆準建造

宮殿一應工程該衙門先期上請

勅下工部會同工科估計以防冒破○又議準凡直
省修造城垣官署兵房及開濬池塘並修理隄

壩石牖橋梁等項工料均造細冊送工科察覈
○康熙四年議準凡河工錢糧每年限八月內
奏銷屆期備造清冊送工科察覈並送河道圖
式備考○十年覆準凡各省糧艘兵船及一切
應差船或奉

旨新造或經朽爛拆修釘板各工料備造細冊送工
科察覈○二十八年議準直省製造盛甲弓箭
器械鐵礮火藥鉛彈等項並分給某旗某營均

覈明經費出入備造細冊送工科察覈○又議
準三年大計有關工部銷算並蘆課錢糧均彙
造細冊送工科察覈○四十二年奏準凡奉

旨建造親王以下及大臣墳塋所用木石等料價直
監造官備造細冊送工科察覈○六十年題準
凡一應修理工程工價五十兩以上物價二百
兩以上者著該處料估啟奏到日工科會同陝
西道御史覈實工完察銷

一各差考覈順治九年定凡工部各關口河差

因收船稅故謂河差均赴工科親領四季印簿令本商自

填船料稅課及竹木柴炭等項數目按季報科

一年差滿仍造送總冊工科移取工部紅單磨

對有舛錯違限者題叅○康熙十八年題準古

北桃林潘家等口木植進口該監督驗明長徑

尺寸什一選收記印紅號由海運至通灣令木

廠筆帖式照驗紅號察收其所收木植按季備

造循環簿送工科覈對○又議準古北桃林潘家等口徵收木稅以任滿日期計八月內交完差滿交代備造清冊分送部科察覈遺漏舛錯者題叅○二十五年議準嗣後工部關稅銀四

季報解其工部紅單工科印簿候差滿日彙報

停其按季呈報

見今領印簿者龍江關蕪湖關荆關通惠河南新關宿遷關辰

關榆關潘桃口

殺虎口古北口

一各差領批順治元年定凡工部各差監督給

精微批文由工部送工科掛號具文送於內閣
填注職名用

實工科給事中引監督於

午門外跪領由科按程定限並回繳日期○康熙
十一年題準凡工部各差回京之日原領精微
批文送科銷號轉繳內閣違限者工科題叅一
月以內者免議一月以外者議處○又定工部
各差應領精微批文如奉

特旨速行赴任者竝內閣用

寶發出工科行文知會該監督出具印文差官赴科
請領凡批內注限以領批日為始限一年回繳
量省分遠近定為正限再加餘限以為往返路
程之期

一六科給發

勅書康熙元年議準直省總督巡撫由吏科總督漕
運總督倉場坐糧廳監督各關監督由戶科學

政由禮科提督總兵官由兵科總督河道暨工部所屬之各關監督由工科各給

勅書任滿送科繳內閣○雍正十二年題準一應坐名

勅書及藩臬監司副叅游擊等傳

勅均於

命下之後內閣官同給事中於

午門外頒給本官祇領如有不遵定制者本科題

叅○乾隆十年議準凡應給

勅書各官如有外任升轉者內閣官奉

勅於該科登號傳該省提塘官齎送該提塘官具領
狀鈐蓋戳記送科備考如違例私發或從他處
轉寄者察出叅處○十五年議準各鹽政

勅印向來均由都察院委官齎送經刑部定議齎送
印信有違定例則嗣後

勅書亦應停止委官齎送歸并戶科給發提塘官齎

往

一稽覈朝單康熙四十年議準每月逢五常朝之期令給事中更番稽察吏禮二部將各部院所送朝單並所收職名送於當直之科覈對如單內有名職名不到者行詢確有事故者免參餘仍指名題參○雍正七年議準凡常朝大小官員職名繫吏部司官按班收訖送科覈對惟滿洲大小官員常朝職名吏部不行開送各科

無憑覈對嗣後先常朝一日滿洲大小官員將
朝單開送吏部一例齊集按次坐班令吏部司
務收受職名同朝單送科覈對無故不至者該
科叅奏○乾隆八年議準嗣後朝期應坐班各
官並無事故託辭不到者給事中覈實題叅
一直宿順治初年定六科官署每日以給事中
一人輪直二日一更代○雍正八年

諭午門外朝房之南科垣之北有碑亭一所供奉

皇考聖祖仁皇帝御製臺省箴碑文此地與六科相近
即著六科輪班撥人守護每日掃除潔淨敬謹啟閉
倘官吏人等仍敢擅入視為憇息之所輪班科員即
行叅奏如科員不奏經朕訪聞定行交部察議欽此

○乾隆五年奏準

端門外東邊一帶朝房撥給吏科戶科各三間禮
科二間西朝房撥給兵科刑科各三間工科二
間為收貯冊卷之所○十八年奏準嗣後六科

移取冊卷並知會直班官弁同啟封識如有不行知會私自開封者令直班官弁立即拏究

一

御門侍班康熙二十五年覆準凡

聽政日各部院奏事以滿漢給事中各二人侍班班在翰林之次○五十四年覆準凡

聽政日滿漢給事中各二人與御史同班侍立

一

御經筵侍班順治十四年定凡

御經筵以滿漢給事中各一人侍班在

文華殿內西嚮立

一驗看月官每月開列滿漢掌印給事中名奏
請

簡用稽察八旗事務宗人府銀庫理藩院內外館銀

庫鄂羅斯來京貿易巡察

盛京吉林黑龍江開列滿給事中名奏請

簡用巡視五城巡視京通十四倉巡視淮安濟寧天津通州漕運巡察臺灣諸差開列滿漢給事中

名引

見

簡用

以上皆與御史同開列不專屬給事中之差

○乾隆十五年奏準嗣

後滿漢科員除巡漕巡察等差為時不甚久遠者仍由都察院按資委署外其奉差學政暨簡署外任何不開闕者該科呈明都察院題請署

理○十六年奏準嗣後科道不論所奉何差在一年外者將科道通行開列具題恭候

簡命一人署理在一年內者由都察院按資委署至科道已奉巡城巡倉等差而又奉別差需人署理者向例在三月外者題署三月內者委署請亦以一年為限以昭畫一

一掌印雍正元年奉

上旨掌印給事中責任緊要交都察院公同簡選保奏○

又定各科掌印給事中員闕該科移會吏科開列各科不掌印之給事中名送院簡選二人出具考語送回吏科繕本具題用都察院印

一升轉凡給事中內升滿漢各一人外轉滿漢各一人每三年一次吏科開列各滿漢給事中
之無事故者呈都察院覈明送回吏科繕本具題各科給事中陳奏事件均豫送吏科備案屆升轉之年繕造黃冊隨本進

呈恭候

簡用

向例每年八月升轉於乾隆十六年改為三年一次舉行

一書吏吏科兵科工科各十人戶科十有三人

刑科十有二人禮科八人皂役每科各四名



欽定大清會典則例卷一百四十六